

UMP, PERODUA rangka kerjasama guna model Jerman



[Nas Norziela Nasbah](#) - April 13, 2021 @ 2:57pm
bhnews@bh.com.my



Zainal Abidin (depan kiri) bertukar dokumen memorandum persefahaman dengan Wan Azhar (berdiri kanan) sambil disaksikan Menteri Pengajian Tinggi, Datuk Seri Dr Noraini Ahmad (tengah). - NSTP/OWEE AH CHUN.

KUALA LUMPUR: Universiti Malaysia Pahang (UMP) dan Kumpulan PERODUA menjalin kerjasama strategik menerusi pelaksanaan Program Sarjana Muda Teknologi (Mod Industri Perantisan) menggunakan model pendidikan kejuruteraan Jerman (Fachhochschule) dalam sistem pendidikan di negara ini.

Kerjasama itu dilihat bakal memperkasakan program Pendidikan Latihan Teknikal dan Vokasional (TVET) dalam negara.

Naib Canselor UMP, Prof Dr Wan Azhar Wan Yusoff, berkata program berkonsepkan 'Earn & Learn' yang julung kali diperkenalkan di Malaysia itu, bakal menjadi tanda aras terhadap pengajian lain dalam menerapkan elemen Revolusi

Industri Keempat (IR4.0) yang menggabungkan teknologi automasi dengan teknologi siber.

Katanya, ia selaras matlamat penubuhan Majlis TVET dengan menyokong inisiatif Kementerian Pengajian Tinggi (KPT) ke arah memperkasakan graduan TVET negara dengan kerjasama Jabatan Pendidikan Tinggi (JPT) dan Lembaga Teknologis Malaysia (MBOT).

"Program ini dibangunkan UMP dengan sumber bakat PERODUA mengikuti pengajaran dan pembelajaran di lapangan tempat mereka bekerja menerusi pendekatan Pembelajaran Berasaskan Projek dan Masalah (POPBL).

"Menerusi kaedah ini, pelajar bekerja seperti biasa sambil melengkapkan kurikulum pengajian melalui projek dan penilaian berasaskan portfolio serta ujian cabaran.

"Pada masa sama, ahli akademik UMP boleh meningkatkan pengalaman dan kemahiran melalui pendedahan sebenar. Golongan itu juga boleh menjalankan latihan industri khususnya di PERODUA, selain menjalankan penyelidikan bersama universiti dan industri," katanya.

Majlis pemeteraian memorandum persefahaman (MoU) itu masing-masing diwakili Wan Azhar serta Presiden dan Ketua Pegawai Eksekutif Kumpulan PERODUA, Datuk Zainal Abidin Ahmad dengan disaksikan Menteri Pengajian Tinggi, Datuk Seri Dr Noraini Ahmad.

Hadir sama Pengerusi UMP, Tan Sri Dr Abdul Aziz Abdul Rahman; Presiden Lembaga Teknologis Malaysia, Datuk Dr Hamisah Tapsir; Ketua Pengarah Jabatan Pendidikan Tinggi, Prof Dr Husaini Omar dan Pengerusi Lembaga Pengarah UMP Advanced, Mohd Sharil Abdullah.

Wan Azhar berkata, sebagai satu daripada rangkaian universiti teknikal Malaysia (MTUN), UMP komited dalam melahirkan graduan kejuruteraan yang cekap bertaraf antarabangsa.

"Kerjasama ini menjadikan program bakal ditawarkan amat praktikal dan fleksibel untuk disesuaikan dengan keperluan negara dalam mendepani cabaran IR4.0, seterusnya melengkapkan ekosistem pendidikan TVET," katanya.

Sementara itu, Zainal Abidin berkata, MoU itu amat bermakna kepada PERODUA kerana bakal menjadi penyumbang dalam penambahbaikan sistem pendidikan tinggi negara, terutama bidang industri automotif.

Katanya, PERODUA melaksanakan inisiatif Program Latihan Remaja PERODUA sejak 1999 dan sehingga kini lebih 3,000 pelajar dan rata-rata graduan diserap bekerja di syarikat automatif itu.

"Kami percaya pendidikan TVET mempunyai prospek luas dan memberi kesan positif kepada ekosistem automotif negara serta industri lain.

"Menjadi harapan pihak kami melihat program ini dapat meningkatkan kemahiran dan taraf pendidikan warga PERODUA kerana ia dirangka khas dengan memberi penekanan agresif terhadap usaha memperluaskan jaringan kerjasama antara universiti dan pihak industri," katanya.